

近代中國史料叢刊第三十三輯

沈雲龍主編

一山文存

章棫著

文海出版社印行

十一山文存  
十二卷

70/6812M

宣統戊午  
曾植署檢

序

吾友章君一山有志於經世詞章之學少壯以貧故橐  
筆走四方年逾強仕始通籍居京師與余同官兩人者  
居相近交相契也余昔在太學嘗欲爲國朝政要猝  
猝未及編纂未幾一山遽爲康熙政要哀然成帙余喜  
一山之先得我心而服其勇辛亥之變同居危城明年  
余南下大病幾死一山留都勅議續成景廟實錄余  
尤敬一山之能見其大而服其忠今歲劉翰怡京卿爲  
刊其集督序於余余嘗謂大清一代人才蔚起理學  
名臣武功文德及經學考據算術駢文類無不夸邁往  
古惟古文不及前代康乾以來方姚梅曾號稱傑出亦

僅儕於元明而遠遜漢唐吾台則尤靡然不振長霖幼時從母舅王子莊師游始學爲古文辭稍長復從王六潭師洎吾友王玫伯章一山相切磋諸君子皆有起衰之志子莊師敦篤好學著書七百餘卷六潭師經學考據詞章斐然有聲世稱台州二王然今已作古人矣其幸而存者王玫伯章一山年皆少於余玫伯著有默齋集經學講義台州文徵等書一山著有康熙政要一山文存諸集皆足與二王先後媲美抑長霖猶有進者傳稱三不朽曰立德立功立言自古聖賢豪傑立身行道與夫豐功偉烈鴻編鉅製焜耀於簡冊者何可勝道卽僅以文論如漢之馬班唐之韓柳宋之歐蘇其文皆磊

落軒天地近世方姚梅曾之流雖稍不逮於前亦皆卓然不朽於世吾輩讀聖賢書事事不及古人又瑣尾流離不能撥亂世反之正而惟降心壹志於立言之事則上之追兩漢之軌起八代之衰次之亦宜方駕元明繼近世方姚梅曾未竟之緒而益光大之以潤色我國家三百年之為業卽就吾台言之宋時南湖之學派樊川之勛業明代正學之氣節文章今俱未有能起而振之者有爲之前而莫爲之後皆吾黨之恥也昔吾家捫藪先生有言願革文章骯髒之習還西京典雅弘奧之風起中興博太混一之氣長霖深澍其言惟迪儒當南渡播遷之際有志振興而後卒未能吾輩所遭之世與

之相近取古人未伸之志而一實行之懸斯言以爲殼  
此可爲知者道難爲俗人言也今者吾輩亦忽忽老矣  
俛仰身世自顧惘然不但立德立功有志未逮卽馬班  
韓柳歐蘇亦望塵而弗及不但方姚梅曾之文恢張無  
自卽鄉先哲之學派勛業氣節文章皆未能於吾身親  
見之焉日月逝於上體貌衰於下僅留此耿耿孤衷拳  
然在念而未知此願之何日償也余故因敘茲集爲述  
欲然之思用告一山而重以自砭焉戊午嘉平月黃巖  
喻長霖

序

吾台人物以宋明爲最盛當明之初尤以寧海爲最盛其時若葉處士兌葉分教伯巨方太守克勤鄭僉事士原及其弟編修士利方侍講孝孺許訓導繼王紀善璞及其弟御史敏文學琦郭太學濬盧編修原質林僉事昇鄭僉事公智之儔或負豪傑之概或志聖賢之學學問氣節經濟文章俱卓然有所表見近二百數十年台之人才遠不如舊而寧海爲尤甚吾友章一山左丞棧生遜志之鄉高才劬學樂親師取友具有起衰繼往之志少困場屋四十以後始獲通籍置身詞林未及十年遽丁陽九之厄其遇可謂窮矣然其忠愛之忱堅貞之



操老而彌篤光宣之際親費用事朝政不綱異說紛拏禍變日亟一山夙夜憂憤思以祖宗之法揅新政之弊迺纂康熙政要二十四卷進於朝辛亥變起日圖輓揅謀卒不用時方纂修景廟實錄同官都半畏亂南下一山堅不肯行約同志數人卒成實錄以報先帝知羸馬敝車出入亂兵悍卒間略不爲動國體旣變轉徙津滬辟地勞山瑣尾流離備書自給艱苦萬狀處之夷然纂明遺民傳數十卷以見志其師友嫻邨有居要津方用事者爭招致之不可得聘修國史亦不就昔元裕之欲修金史以報故國而委蛇於異代之朝貴君子惜其近於降志辱身若危太樸之蒙面異姓借國史以

自脫尤無恥不足道一山以實錄之命出自朝廷必終其事國史之聘出於異代堅不與聞其辨義之精自守之固非有得於鄉先正方遜志諸賢之學者而能如是乎宋社之屋台多遺民寧海有舒閩風劉樗園胡梅欄三先生皆隱居著書各積至數百卷而胡氏通鑑注尤有功於學者一山之志固不欲僅如三先生卽其志不遂終於纂著亦可幾三先生然則寧海二百數十年之衰得一山庶有以振之歟一山嘗寓余書言吾輩遺民有宜審計者二事一身後志銘不可出異代達官之手一平日文字不可不及身自定旣爲余校印默齋集今翰怡京卿亦任槩一山集責敘於余余故略述其梗概

至其文之有關國故詩之雅近遺山讀者能自得之余  
故不復贅云太歲在著雍敦牂皋月黃巖王舟瑤

序

予生世較晚不獲親同治中興之將相名儒而同光間人多及見之其時大難初平朝局端暇海內學者大都紹述乾嘉學派閒治康雍漢宋持平之學孳孳務實無光緒季年遺置一切侈口慕效外人之習氣蓋本朝之學原於孫夏峰張楊園顧亭林黃南雷諸巨儒而聖祖以天縱之姿復終身懋學如老生監於明弊範圍曲成剏闢至正不易之大道高宗承之益廣其業博綜眾流而折衷於六藝修明先王先聖之經法足以啟宇宙會歸之盛而推暨乎文軌之同學術之所以久而常新也不幸宣統辛亥大亂斯文頽廢老成亦相繼彫

謝予流寓上海未敢自放輒有抱遺訂鑿之心凡京外士大夫避地而來驅車而去其爲同尤閒聞人每樂與之過從冀以商量乎舊學歲癸丑晤寧海章一山左丞憶予少時爲舉業兼治經學考據古文詞常閱會城三書院與詰經精舍各課藝多左丞之文欽遲者久矣左丞寓滬時而出游南北時而杜門撰箸髮垂垂白矣以予方徵刻先正遺箸出其鈔本舒閱風集屬梓予纂明史例案左丞亦爲明史義例彙編考訂予書者數事因知其學少從德清俞曲園先生治經入詞館後肆力於史而其遭變匿處泣念故國有不可明言之隱則似其同縣宋時之葉鎮之少保蓋實循康乾學派之遺緒而

無少流失者觀其敘王致伯觀簪默齋集自謂師其鄉  
明時方遜志宋時胡景參及本朝會稽之章實齋略  
有所得信乎其有所得也著書多種康熙政要二十四  
卷再經進呈爲典學日講之書其文集曰一山文存  
宣統元年卽行於京師已無有矣予爲益以近年之作  
釐十二卷校而刻之用以知本朝學術源流之所在  
非徒以兩家文字交誼也至其羈旅一編蕭然物外亦  
足以見其所守之定矣戊午夏六月吳興劉承幹敘於  
上海寓居之嘉業堂



一山文存目錄

卷一經說

先甲三日後甲三日 我之弗辟 碩人之軸  
證以中垢 武王靡不勝 凡王之稍事 饋食  
之籩 凡裸事用概 行以肆夏趨以采齊車亦  
如之 九貉

卷二經說

卜筮不相襲 祭五祀或於廟或於宮中 不敢  
袒裼 登席不由前 舞自八以下服杜異義  
穀伯綏來朝鄧侯吾離來朝 爲曹羈諱也 郟  
子來朝 實爲夏郊三代祀之 哀哉不能言左



氏義與今詩異說

卷三國史傳稿

徐用儀 許景澄 袁昶 王文韶

卷四國史傳稿

張仁黼 陸元鼎 馮子材 孫昌凱

卷五國史傳稿

葛寶華 袁保齡 孫詒讓 汪宗沂 童兆蓉

鄭敦允 趙潤生 楊斯盛

卷六雜文

漢書藝文志爾雅入孝經家說 家石屏先生傳

官莊旅舍記 正平本論語跋 校荀子跋

穀梁注引二傳彙證跋 續修章氏房譜敘 輯  
錄任天卿集跋 臨海尤君行略 叔母童孺人  
行略 族祖母俞孺人行略 章氏親族記

卷七雜文

復王子莊先生 上俞曲園先生 復勞益齋茂  
才 上嘉定徐侍郎 題梅林課子圖 光緒聖  
政記敘 復王玫伯孝廉 復朱郁堂同年 先  
府君行述 先妣行述 祖父兩世墳記

卷八雜文

復王玫伯孝廉 任光福墓表 譯小學校教授  
學管理法綱要敘 先儒王夫之黃宗羲顧炎武

從祀 孔廟議 擬請先儒方克勤從祀 崇聖  
祠摺 擬請增輯四庫全書摺 兄弟相及宗廟  
異昭穆同昭穆考 擬請 飭議臣民兼祧服制  
摺稿 四原原理敘 攝政睿親王貽唐通馬科  
二書墨蹟跋

卷九雜文

再續詞林典故議 康熙政要後敘 上瞿協揆  
寄陳筱石制軍 王蘊齋封翁七十雙壽敘  
京師譯學館同學錄敘 移 實錄館總裁 上  
陸相國 戴母王孺人墓表 周母陳孺人八十  
壽敘 王玫伯觀簪默盦集敘 上陸太保 樊

時勳太守七十壽敘 蕭山縣訓導陳公墓表  
林述周明經墓誌銘 答內務部 答政事堂  
卷十雜文

家四君傳 續修章氏族譜敘 正續共和正解  
跋 錢聽邠觀答壽言敘 家漢槎先生七十壽  
敘 重刻閬風集敘 孔宅詩敘 致于晦若侍  
郎 答金雪孫前輩同年 明史義例彙編叙  
答呈徐太保 答楊子權明經 貴州清谿縣知  
縣饒君墓表 題鈔本嘉慶大清一統志 道墟  
章氏義田記 唐元素大令文集跋 節孝金母  
徐恭人傳

卷十一雜文

題烏程周味詩資政遺像 錢聽邠觀簪封松漬  
淚圖敘 郝母王宜人七十壽敘 本朝台州進  
士詞科特科題名記 上朱師傅 劉紫回虞衡  
別傳 金雨梧大令墓碣 項城袁固之墓誌銘  
南皮張烈女傳 張振卿總憲八十壽敘 陳  
發菴師傅七十雙壽敘 綸旅金鑑後敘 章氏  
續修會譜敘

卷十二駢文

浙使紀程詩敘 沅上稱觥集敘 道路聯吟集  
敘 如園架上書目敘 送符考盦大令移居敘

高潛子詩鈔敘 吳蓮谿秘書郎借澆集敘

爲吳學使諭諸生文 爲吳學使通飭舉報孝義

篤行文 族叔夢三先生六十壽敘 張埜秋尙

書六十 賜壽敘 陸相國七十雙壽敘 陳瑤

圃侍郎六十壽敘 王玫伯孝廉祖母程太孺人

母周太孺人壽辰徵詩文啟 王母謝夫人六十

壽敘 盧扶常舍人之母李恭人六十壽敘 陸

相國比翼南旋圖徵詩文啟 聖誕日約往曲阜

展謁廟林啟 復知縣某君



一山文存卷一

寧海章棧

經說一

先甲三日後甲三日

晚漢易學以鄭荀虞爲最著然鄭荀俱祖費氏古文學  
虞則世傳孟氏今學家法各異故輒相齟齬究之虞言  
升降不如鄭言禮制之可據也蠱卦先甲三日後甲三  
日子夏傳先甲三日辛壬癸後甲三日乙丙丁辭義淺  
率僞書不足采也虞云初變成乾爲甲至二成離爲日  
謂乾三爻在前故先甲三日賁時也變三至四體離至  
五成乾乾三爻在後故後甲三元妄時也則就互體  
以釋義而於義仍無所得惟鄭之訓曰甲者造作新令



之日甲前三日取改過自新故用辛甲後三日取丁寧  
之義故用丁此據禮說易之可信者也何也按史記律  
書甲者言萬物剖符甲而出故古者律令之文多稱甲  
管子中之甲篇漢之令甲可證也顧以甲爲令有徵矣  
而鄭云前三日用辛後三日用丁何謂也按此以時與  
行言之也於時甲爲春辛爲秋丁爲夏春行政則前乎  
此而以夏令之後乎此而以秋成之此古者明堂陰陽  
法也於行甲爲木辛爲金丁爲火盛德在木則先乎此  
而以金革之後乎此而以火化之此古者洪範五行法  
也皆鄭君之所本也且蠱之言先後甲猶巽之先後庚  
也特甲爲剝爲革故先後用辛用丁取相剋也庚爲更

爲續故先後用丁用癸取相成也此鄭之注蠱而巽可推也至前乎鄭而馬之訓曰甲爲十日之首蠱爲造事之端故舉初而明事始也言三日者不令而誅謂之暴故令先後各三日欲使百姓徧習行而不犯義亦與鄭同鄭嘗入關事扶風知必有所受也若備嗣言甲者拗制之令云云則竊馬之說與鄭之義未足以知其深也

我之弗辟

東京博士老悖言古文學者亦復專輒自是惟鄭君博通今古家法而又熟習三代典禮故鄭學出而兩京之學皆有所統也金縢周公乃告二公曰我之不辟我無以告我先王僞傳辟法也言我不以法治三叔則我無

以成周道則卽許君我之不彛之說許於書宗孔氏或爲古文家之佚語然義據殊淺不若鄭訓之精且深也鄭云我今不辟孺子而去我先王以謙讓爲德我反有欲位之謗無告於我先王云云則辟爲避位與馬扶風辟謂避居東都之說合爲今人有以此語爲鄭注者誤最得古義非淺

俗所能周知者今試爲釋之案三代以上君臣受治之法與秦漢以後異武王沒成王幼周公攝政卽周公正南面之位也後儒習見晚近人臣無代君南面之事故於此事則詫以爲異遂遷就於以辟爲治之迂說殊不知三代以前官天下家天下授受之事行以至公初無末世嫌疑之私見請言舜禹其初皆臣也堯崩則舜攝

舜崩則禹攝孔子言百官總己以聽於冢宰三年此卽  
臣居君位行君事之實證孟子所謂舜避堯之子禹避  
舜之子乃居攝後避位之事若攝位則本無所疑不待  
避也鄭以辟爲避位卽據孟子舜禹之避以立義其言  
堦不可易也至若太甲在桐伊尹攝位則事益明顯蓋  
惟三代聖人行以至公故君臣易位習以爲常周公以  
聖人行此常行之事管蔡雖愚豈不之察其所以致疑  
者殆以七年而不避位也故周公曰我之弗避我無以  
告我先王鄭訓自得經義由此足知攝政之必居位也  
且事有相反而可證者僞學周公無過王莽學之之迹  
必求其肖也其易漢祚而託於公也曰居攝元年元年

者卽位之年也若公居攝之日不卽位則莽何敢託卽託之人亦孰從而信之莽託之人信之則公居王位之事益著矣旣居王位則避自爲避位也史記世家言我之所以弗辟而攝行政者恐天下畔周無以告我先王云云則是以避爲避嫌與鄭異而攝位之大旨與鄭同蓋史公從安國問故其言或本古文家之雜說要之攝位故事史公瞭然於胸故所言先後一轍也後世公道不明窺竊紛起儒者習聞其事而於三代帝王之學亦藐不究心無怪其以鄭學爲非也

碩人之軸

傳云軸進也陸氏釋文孔氏正義皆云軸毛音迪蓋据

桑柔傳迪進也之訓軸迪皆从由得聲本可通轉康成  
不達毛義故易訓爲病陸氏孔氏皆云軸鄭讀逐則据  
爾雅釋詁逐病也之文蒙案康成此詩皆易毛傳軸與  
逐雖同聲得相段借然以退而窮處爲賢者病大失詩  
人美之之意竊謂毛之訓進其說塙不可易進之義與  
漸爲轉注易漸卦虞注漸進也云進者蒙上而見義也  
碩人之迪言碩人之進于陸猶易漸鴻漸于陸之義也  
詳玩詩義與漸卦之義適符此詩爲莊公不能用賢使  
賢者退而窮處作也漸象傳曰漸君子以居賢德善俗  
曰居賢德則非達而在位可知曰善俗則非化成天下  
可知是其立義本同也詩首章云考槃在澗傳山夾水

曰澗漸初六云鴻漸于干虞注水從山流下俯干卽毛  
山夾水之義矣是首章與漸義同也二章云考槃在阿  
傳曲陵曰阿漸六二云鴻漸于磐馬融注云山中石磐  
紆故傳磐磐紆者卽毛傳曲陵之意是二章與漸義同  
也至三章云考槃在陸漸九三云鴻漸于陸文亦同矣  
此以知詩義之符于易也但易之例在取象故其詞託  
于鴻詩之例在賦物故其詞寄諸碩人易以卦爲名故  
其詞可疊言漸詩以韻成文故其詞不能累言軸易以  
簡言之故一語足以成義而其文卽曰鴻漸于陸詩以  
長言之故合二語以成義而其文必曰考槃在陸碩人  
之軸要其意皆無異也況詩之章次井然有條亦無不

與易同首章云在澗則入山尙未甚深其人固寬大山  
猶漸于干意也二章言在阿則較澗爲深矣其人亦寬  
大也猶漸于磐意也卒章言在陸則較阿而又深矣此  
其人所以爲漸進也卽九三之義也是其次第深淺亦  
無不同也或曰詩言進于陸而止易則猶有漸于木漸  
于陸矣此殆不同者與不知馬注云山上高平稱陸進  
于陸則極高而深更無可進之境故易雖云漸于木漸  
于陸以符爻數而上九仍終之曰鴻漸于陸此陸之上  
無可進詩人所以咏在陸而止也且漸上九云鴻漸于  
陸其羽可用爲儀吉象曰其羽可用爲儀吉不可亂也  
王輔嗣云進處高絜不累于位无物可以屈其心而亂



其志峨峨清遠儀可貴也竊讀羣經平議說下永矢弗  
告句謂毛訓無所告語爲未得而改訓告通牝卽古文  
攬牝亂也謂碩人長以道自誓而不敢牝亂則象傳所  
云不可亂者卽永矢弗牝之誼矣此以知詩之理本通  
于易益信毛公進也之訓爲有據而平議之得于詩者  
更深矣

証以中垢

嘗謂鄭君注禮有某讀爲某某讀如某某讀若某之例  
說經家言之悉矣而毛公傳詩有某言某也之例前人  
未之審是亦說詩者之病也竊案毛公所云某言某也  
之類皆述古之成言其詞或一言或兩言或四言或一